

یوہ آکاشوانی جموں بے عیبالرحمان تیں خبر سُنو۔

\*\*\*\*\*

### LG STATEHOOD

لیفٹیننٹ گورنر منوج سنہا نے اس گل نانہہ ایک بار پھر دوہرایو ہے کہ جموں کشمیر نانہہ ریاست غو درجو صیح وقت آن ور دتو جے غو۔ انہاں نے کہیو کہ وزیر اعظم نریندر مودی تے وزیر داخلہ امت شاہ غو جموں کشمیر غی عوام نال یوہ وعدو ہے تے عوام نانہہ اُن گا الفاظ تے وعدہ ور یقین رکھنو چاہیے۔ ایک نجی نیوز چینل نال انٹرویو غے دوران ایل جی موصوف نے کہیو کہ وزیر اعظم نریندر مودی تے وزیر داخلہ امت شاہ نے پیاہ گل کہی تھی کہ جموں کشمیر مانہہ انتخابی حلقاں غی حد بندی تیں بعد اسمبلی انتخابات کرایا جئیں گا تے فر صیح وقت ور جموں کشمیر نانہہ ریاست غو درجو دتو جے غو۔ اس دوران اسمبلی انتخابات تاریخی رپا تے پتھر بازی گو ایک وی معاملو درج نی ہویو تے بڑی تعداد مانہہ لوکاں نے انتخابات مانہہ حصو لیو۔

\*\*\*\*\*

### Dy CM SELF ENUMERATION

مردم شماری 2027 غے تحت شروع کیا گیا خود شماری مرحلہ مانہہ گزشتہ روز نائیب وزیر اعلیٰ سریندر چوہدری نے سیول سیکرٹریٹ سرینگر مانہہ اپنی خود شماری غو عمل کامیابی نال مکمل کیو۔ اس دوران موصوف نے اس عمل نانہہ ہر شہری وستے بالکل آسان بنان ور خوشی گو اظہار کیو۔ موصوف نے تمام شہریاں تے جموں کشمیر غا رہائشیاں تیں اپیل کی ہے کہ وے خود شماری غا اس عمل مانہہ بڑھ چڑھ غے حصو لیں۔ اس دوران دیگر وزراء جن مانہہ وزیر سکینہ اتو، جاوید احمد ڈار تے ستیش شرما نے وی مردم شماری 2027 وستے اپنی خود شماری مکمل کی۔ ان تیں علاوہ کئی ممبر قانون سازاں نے وی اپنی خود شماری درج کرائی جن مانہہ تنویر صادق الطاف احمد وانی، حسنین مسعودی تے افتخار احمد شامل تھا۔

\*\*\*\*\*

### ITOO ECCE

سماجی بہبود غی وزیر سکینہ اتو نے گزشتہ روز ایک اعلیٰ سطحی میٹنگ غی صدارت کرغے جموں کشمیر غے اندر سماجی فلاح۔ وی بہبود محکمہ غی طرفوں بچاں غی دیکھ بہال تے تعلیم خاطر چایا گیا اقدامات غو جائیزو لیو۔ اس میٹنگ غے ذریعے موصوف نے ای۔ سی۔ سی۔ ای اقدامات غو جائیزو لیو تے تعمیراتی ڈھانچہ غے نال استاداں غی تربیت اندراج غا طریقہ کار تے دیگر اہم اقدامات غو جائیزو لیو۔ جن مانہہ 3 تیں 6 سال غی عمر تک غا بچاں نانہہ بُنیادی معیاری تربیت غا اقدامات شامل ہیں۔ اس دوران موصوف نے سماجی فلاح۔ وی بہبود محکمہ غا ای۔ سی۔ سی۔ ای اقدام غی اہمیت ور روشنی پائی تے دسیو کہ کسی طرح یوہ قدم چھوٹا بچاں غے اندر ذہنی صلاحیتاں نانہہ مضبوط تے بیدار کرن مانہہ اپنو کردار ادا کر رہیو ہے۔

\*\*\*\*\*

### DISHA MEET JMU

ممبر اپرلیمنٹ جُگل کشور شرما نے گزشتہ روز جموں مانہہ دشا میٹنگ غی صدارت کی تے ضلع غے اندر مرکزی فلاحی سکیمان غی عمل آوری تے دیگر فلیگ شپ پروگراماں گا نفاذ غو جائیزو لیو۔ دشا کمیٹی غا کو۔ چئیر پرسن تے راجیہ سبھا ممبر ستپال شرما نے وی اس موقعہ ور اپنی قیمتی رائے پیش کی۔ میٹنگ غے دوران مجموعی جائیزہ تیں بعد ممبر پارلیمنٹ جُگل کشور شرما نے اس گل ور زور پایو کہ تمام مکمل ہو چُکی فلاحی سکیمان غی بغیر کسے تاخیر تیں عمل آوری ہونی چاہیے تانجے عوام ان تیں فائدو حاصل کرسکیں۔

\*\*\*\*\*

### ADVISOR YATRA/ EID ARRANGEMENTS

وزیر اعلیٰ عمر عبداللہ غا صلاح کار ناصر اسلم وانی نے گزشتہ روز جموں مانہہ اعلیٰ افسران نال ایک اعلیٰ سطحی میٹنگ غی صدارت غے دوران گرمیاں گا اس موسم وستے کی گئی تیاریاں تیں علاوہ آئیندہ یاترا تے عید الاضحیٰ غا تہوار وستے کیا گیا انتظامات غو جائیزو لیو۔ میٹنگ مانہہ خطاب غے دوران صلاح کار موصوف نے تمام افسران نانہہ ہدایت جاری کی کہ وے گرمی غا اس موسم مانہہ بجلی تے پانی سپلائی نانہہ ہر حال مانہہ یقینی بناویں۔ اس تیں علاوہ خوردنوش غی ضروری اشیاء تے طبعی دوائیاں تیں علاوہ شری امرناتھ جی یاترا غے دوران موبائل طبعی یونٹ قائم کریں۔ مچیل ماتا یاترا تے بڈھا امرناتھ یاترا وستے وی اسے طرح

غی ہدایت جاری کرتا وان موصوف نے کہیو کہ قومی شاہراہ ور حساس جگہاں ور گڈیاں غی  
آؤ جائی ور وی خصوصی نظر رکھی جے تے آمدرفت نانہہ ہر وقت یقینی بنایو جے۔

\*\*\*\*\*

## SALAL DAM FLUSHING

ضلع انتظامیہ ریاسی نے سلال پاور سٹیشن جیوتی پورم غا مقام ور قائم سلال ٹیم وچوں ریت  
تے مٹی غی صفائی خاطر عوام نانہہ مطلع کیو ہے۔ آکاشوانی جموں غا نمائندہ نے خبر دتی ہے  
کہ ضلع مجسٹریٹ دفتر غی طرفوں جاری اس ہدایت غے مطابق سلال بانده غا سیلابی اخراج  
دروازاں نانہہ 21 مئی 2026 غے روز سویرے 9 بجے تیں 30 مئی 2026 تک کھلو رکھیو جے غو  
تانجے ٹیم غے اندر جمع ریت تے مٹی نانہہ صاف کیو جاسکے۔ اس دوران پانی غا اخراج نال  
جناب دریا مانہہ پانی غی سطح 2 تیں 3 میٹر تک بدھن گو امکان ہے۔

\*\*\*\*\*

## SPEED RADAR GUNS

جموں سرینگر قومی شاہراہ ور محفوظ سفر نانہہ یقینی بنان خاطر ٹریفک پولیس ادھمپور نے  
جدید ٹریفک نفاذ مہم غے تحت سپیڈ رڈار گن متعارف کی ہیں نوا متعارف ہویا یہ الہ گڈیاں غی  
رفتار نانہہ کجھ فاصلہ وروں ناپ لیں گا تے جیسی ہی کونے گڈی مقررہ رفتار تیں زیادہ تیز  
چلے ئی یہ الہ اُس گڈی غی رفتار نانہہ فوری ریکارڈ کریں غا تے بے ضابطگی نانہہ درج  
کریں گا۔ اس بارے حکام نے دسیو ہے کہ شاہراہ ور زیادہ تیزی نال گڈی چلان ور ای چلان  
جاری کیا جنیں غا تے شاہراہ ور قوانین غی خلاف ورزی کرن آلا غا موبائل فون ور میسیج  
غے ذریعے چلان ٹریفک قوانین غی خلاف ورزی تے جرمانہ غی رقم متعلق جانکاری دے دتی  
جے غی۔ اس قدم غو مقصد شاہراہ ور لاپرواہی نال گڈی چلان ور قابو پانو تے دیگر حادثاں  
نانہہ کھٹ کرنو ہے۔

\*\*\*\*\*

## PROG ANN

علاقائی خیراں آلو شعبو آکاشوانی جموں 21 مئی 2026 نانہہ دہشت گردی غے خلاف تہاڑہ گا  
موقعہ ور 25 منٹ گو ایک خصوصی پروگرام نشر کر رہیو ہے۔ اس خصوصی پروگرام گو  
موضوع اتحاد، امن تے دہشت گردی غے خلاف صفر برداشت رکھیو گیو ہے۔ اس خصوصی  
پروگرام مانہہ مارا مہمان وین گا برگیڈیر ریٹائرڈ راجن جموال جہڑا اس موضوع ور اپنی ماہرانہ  
رانے پیش کریں گا۔ اس پروگرام غی میزبانی مارا انکر جگموہن شرما کریں گا۔

\*\*\*\*\*

NEWS READ BY ABAID-UR-REHMAN  
NEWS EDITOR KUNAL SHRIVATSA  
DEO NUSRAT  
SKILLED RAJAT  
TECH ASST EHSAN